

## Ha Likhohlano li Hlaha



### SABATHA MANTSIBOEA

#### **Bakeng sa Boithuto ba Beke Ena Bala:**

Liketso 6:1–6; Liketso 10:1–23; Matt. 5:17–20; Liketso 11:3–24; Liketso 15:1–22; Amose 9:11, 12.

#### **Teman'a Khopolo:**

“Hobane lona bohle ba kolobelitsoeng ho Kreste, le apere Kreste. Ha ho sa le mo-Juda leha e le mo-Gerike; ha ho sa le ea ruileng, leha e le ea sa ruoang; ha ho sa le monna, leha e le mosali; hobane kaofela ha lona le ntho e le 'ngoe ho Jesu Kreste” (Ba-Galata 3:27, 28).

**O** mong oa mesebetsi e thata ka ho fetisisa eo sechaba sa Bakreste se lokelang ho o etsa ke ho boloka bonngoe ha ho hlaha maikutlo a fapaneng mabapi le litaba tse amang boleng le thomo ea kereke. Liphapano tsena li ka tlisa litlamorao tse mpehali. Liphutheho tsa Bakreste tsa kajeno ha li ea fapana le tseo re li bonang Testamenteng e Ncha. Batho ke batho, 'me liphapang, le holim'a lintlha tsa bohlokoa, li tla ba teng. Bakreste ba pele ba ne ba tobana le likhohlano tse tliisoang ke maikutlo a nyatso a motho ka mong le ke liphapang tse tiileng tsa botoloki ba lipale le mekhoha ea Testamente ea Khale. Likhohlano tsena li ka be li sentse kereke bonyaneng ba eona hoja e ne e se ka baapostola le baetapele ba inahanang ba ileng ba batla tataiso ea Moea o Halalelang le Mangolo ho rarolla litsitsipano tsena. Libeke tse fokolang tse fetileng, re ile ra ithuta kamoo kereke ea pele e ileng ea ba le boiphihlelo ba bonngoe ba kereke. Bekeng ena re tla talima kamoo kereke ea pele e neng e rarolla likhohlano tse neng li le teng kahare tse neng li batla ho senya bonngoe ba eona le ho bea bophelo ba eona tlokotsing. Likhohlano tsena ene e le life, li ile tsa rarolloa joang, 'me re ka ithuta'ng kajeno ho tsoa maiphihlelong aa?

*\*Ithute thuto ea beke ena ho lokisetsa Sabatha sa la 17 Pulungoana.*

## Khethollo ea Merabe

**Bala Liketso 6:1. Ke taba efe kerekeng ea pele e neng e bakela batho ho tletleba ka kabo e lokileng hape e lekaneng ea lijo bakeng sa bahlolohali?**

---

Bakreste ba bang ba pele ba ne ba bonahala ba khetholla bahlolohali ba ba-Gerike ba har'a bona 'me ba ba fa lijo tse nyane ho feta bahlolohali ba ba-Heberu. Pelaelo ena ea leeme e ile ea baka lekhalo har'a phutheho ea balumeli ba pele. Hore na khethollo ena e ne e le teng e le kannete kapa che, temana ha e bolele. E re feela batho ba bang ba ne ba lumela hore e teng. Khohlano ena e ile ea bea bonngoe ba kereke tlokotsing e sa le kapele. Ho makatsa ha ka kang hore khethollo ea merabe e ile ea bonahala kapele hakalo ka hare ho kereke.

**Bala Liketso 6:2–6. Ke mehato efe e ileng ea nkuoa ke kereke ea pele ho rarolla ho se utloisisane hoo?**

---

Kereke ea pele e ne e hola ka sekhahla, 'me kholo ena e ne e eketsa meroalo e boima holim'a baapostola. Khetho ea banna bana ba supileng, bao ka tloaelo ba bitsoang "batiakone" (leha Testamente e Ncha e sa ba bitse joalo), ba ile ba imolla tsitsipanong e neng e le kerekeng ea Jerusalema 'me ea lumella boikamahanyo ba batho ba bangata ho feta bosebeletsing ba kereke. Baapotsola ba mamela litletlebo tsa balumeli ba buang se-Gerike ka hloko eaba ba ba botsa ka tharollo. Khetho ea banna ba supileng ho ba bathusi ba baapostola e ile ea sieloa sehlopha sena, 'me ba ile ba kothalletsa barutuoa ba supileng, bao kaofela ha bona ba neng ba tsoa puong ea se-Gerike. Banna bana ho boleloa hore e n'e le ba "tšeptjoang, ba tletseng ka Moea o Halalelang le hlalefo" (Liketso 6:3). Bosebeletsi ba baapostola, boo ho fihlela nakong eo e neng e ntse e le ho ruta Lentsoe la Molimo le ho aba lijo ho bahlolohali, bo ile ba aroloa ka lihlopha tse peli, sehlopha ka seng se etsa mosebetsi o lekanang le o mong ka bohlokoa bakeng sa khaso ea evangeli. Luka o sebelisa lentsoe le tsoanang, "bosebeletsi" kapa "tšebeletso" (diakonia), ho supa ka bobeli bosebeletsi ba baapostola ba ho ruta Lentsoe (Liketso 6:4) le bosebeletsi ba batiakone ba ho aba lijo (Liketso 6:1).

**U bona bohlokoa bofe tabeng ea hore baetapele ba ile ba bitsa balumeli ba bangata ho tla hammoho (Liketso 6:2) ho leka ho fumana tharollo?**

## Tšokoloho ea Balichaba

Tšokoloho ea Balichaba ho tla evangeling ea Kreste ke ketsahalo bukeng ea Liketso e lokisang sethala sa khohlano e khlohali bophelong ba kereke ea pele, khohlano e neng e beha bophelo le thomo ea eona tlokotsing.

**Bala Liketso 10:1–23. Ke lintlha life litemaneng tsee tse bontšang hore Moea o Halalelang o ne o le tšebetso lipelong tsa batho ba bangata ho lokisetsa Balichaba hore ba tle ba amohele evangeli?**

---

Pono eo e tlameha e ne e le e sa tloaelehang haholo ho Petrose. O tšositsoe ke eona hobane, e le mo-Juda, o ne a e-so ka a e-ja lijo tse sa hloekang kapa tse litšila, joalo ka ha molao o ne o hloka (sheba Levitike 11, Ezek. 4:14, le Dan. 1:8). Leha ho le joalo, sepheo sa pono e ne e se lijo empa e ne e le makhalo a pakeng tsa ba-Juda le Balichaba a neng a sitisa khaso ea evangeli. Makhalo a joalo a ne a hlahelletse lefatšeng la khale joalo ka kajeno. Mashomeng a qalang a lilemo, Bokreste bo ne bo bopiloe haholo-holo ka ba-Juda ba neng ba amohetse hore Jesu ke Mesia oa pallo oa boporofeta ba Testamente ea Khale. Balumeli bana ba pele ba Jesu e ne e le ba-Juda ba tšepelang ba neng ba boloka molao joaloka ha ba rutiloe. Ba ne ba sa nke evangeli ea Jesu Kreste e hlakotse kapa e felisitse litaelo tsa Testamente ea Khale (sheba Matt. 5:17–20).

**Bala Liketso 10:28, 29, 34, 35. Petrose o ne a utloisisa se boleloang ke pono ea Joppa joang? Ke eng e ileng ea mo susumetsa ho e toloka joalo?**

---

Seo re se bonang se etsahala ho Liketso ke hore Moea o Halalelang o ne o lokisitse tsela ea hore Balichaba ba tle ba amoheloe kopanong ea boena ea phutheho ea Bakreste. 'Me ba ne ba ka etsa sena kantle le hore ba be ba bolotsoe kapa ba fetohle ba-Juda pele. Ke eng e ileng ea khohlisa Petrose le metsotso ea hae hore efela hona e ne e le thato ea Molimo ke tšollelo ea Moea o Halalelang holim'a Kornele le ba ntlo ea hae ka tsela e tšoanang le eo barutuo ba Jesu ba ileng ba ba le boiphihlelo ba eona ka letsatsi la Pentekonta (Liketso 10:44–47). Haeba Moea o Halalelang o ka neoa Balichaba ka tsela e tšoanang le eo o neuoeng ba-Juda, hoa hlaka ke hona hore ha se setlamo hore motho a bolle pele e ka ba molumeli ho Jesu e le Mesia. Qeto eo e ile ea bula tsela bakeng sa khohlano ea litaba tsa Molimo har'a Bakreste ba pele.

## Moea o Eta Pele

Litlaleho tsa se etsahetseng Sesarea ka Kornele tsa phakisa tsa filha ho baetapele ba phutheho ea Bakreste e Jerusalema, 'me ba kopa Petrose ho fana ka tlaleho ea se etsahetseng. Ba ne ba koatisitsoe ke seo Petrose a se entseng hobane, ho latela kutloisiso ea bona ea Molao oa Moshe, ba-Juda ba tšepahalang ba ne ba sa lokela ho ja le Balichaba (Liketso 11:3).

**Bala Liketso 11:4–18. Petrose o ile a reng ho hlalosa mosebetsi oa Moea o Halalelang le tataiso ea hae ketsahalong ee? O ne a fetisa taba efe ka ho pheta se etsahetseng?**

---

Leha ba bang ba ile ba ba le lipelaelo ka ho nepahala ha liketso tsa Petrose le geto ea hae ea ho kolobetsa Balichaba bana, lipaki tse lekaneng (Liketso 11:12) li ile tsa pakahatsa hore efela Moea o Halalelang o ile oa iponahatsa ka tsela e tšoanang le ea Pentekonta. Tataiso ea Moea o Halalelang boemong bona e ka se tsekoe 'me neo eo ea ananeloa. “Eare ha ba utloa taba tseo, ba lesa ho belaela; 'me ba tlotlisa Molimo ka hore: Efela Molimo o neile le balichaba pako, hore ba bone bophelo” (Liketso 11:18).

**Bala Liketso 11:19–24. Ho ile ha latela ketsahalo efe bophelong ba kereke ea pele?**

---

Mohlomong ba bang ba leng Jerusalema ba ile ba nahana hore se etsahetseng ka Kornele le ba ntlo ea hae e tla ba se ikhethang 'me boiphihlelo bo joalo ha bo na ipheta. Empa seo ha se seo Moea o Halalelang o neng o se rerile. Ha barutuo ba Jesu ba qhalantsoe ho fetela pele mose ho Jerusalema le Judea, ka lebaka la hloriso e ileng ea tsoha kamor'a lefu la Setefane (Liketso 8:1), 'me ba ea Samaria, Fenisia le Sibera le Antioke, Balichaba ba 'na ba amohela Jesu e le Mopholosi oa bona, ba 'na ba tsoelapele ho eketseha. Sena ke seo Jesu a neng a ile a se porofeta (Liketso 1:8). Leha ho kena hona ha sekhahla ha Balichaba ho ne ho le hotle ha kaalo, ha re ka ikenya lieteng tsa balumeli bana ba pele ba ba-Juda, re ka bona lebaka leo ba neng ba se na bonnete ba seo ba lokelang ho se etsa.

**Ke joang rona ka borona re ka bang le kutloisiso tse fokolang tseo re li nkang kerekeng tse ka senyang bopaki ba rona?**

## Lekhotla la Jerusalema

**Bala Liketso 15:1, 2 le Ba-Galata 2:11–14. Ke lintho life tse peli tse bakileng khohlano e kholo kerekeng ea pele?**

Tlokotsi e neng e tobane le Bakreste ba pele e ne e tiile 'me e le e thata. Ba bang ba ba-Juda ba ne ba nahana hore pholoho e ne e tla etsahala feela ka bao e neng e le karolo ea sechaba sa Molimo sa selekane, 'me sena se ne se tsoanela hore e ka khona lebollo le etsoe pele. Hape balumeli ba ba-Juda ba ne ba lumela hore, e le karolo ea tsela e tšepahalang ea bophelo, ba lokela ho qoba ho kopana le Balichaba ka tsela e ka sitisang pholoho ea bona. Ba-Juda ba ne ba na le litloaelo tse tiileng mabapi le boikamahanyo ba bona le Balichaba. Litloaelo tsena tsa phakisa ho ba lejoie la khopiso ho phutheho e ncha ea Bakreste ha baapostola ba qalella ho fihlela Balichaba ba neng ba lakatsa ho ba balateli ba Jesu. Hobane Mesia o lokela ho ba Mopholosi oa sechaba sa Molimo sa Selekanane, joalo ka ha ho porofetiloe Testamenteng ea Khale, na Balichaba ba ne ba sa lokela ho fetoha ba-Juda pele 'me ba latele melaoana e tsoanang ea selekane haeba ba ne ba lokela ho bolokeha?

**Bala Liketso 15:3–22. Ke li feng tse ling tsa lintho tse ileng tsa tekoe Lekhotleng la Jerusalema?**

Motso oa taba mona e ne e le likhohlano tse bakoang ke botoloki ba lipale tsa Testamente ea Khale mabapi le lebollo le kamano le Balichaba. Baapostola, baholo, le baemeli ho tsoa Antioke ba lula fatše hammoho, 'me ho bonahala e ka puisano e ile ea tsoela pele ka nako e telele ho se na tharollo. Empa Petrose, Barnabase le Pauluse ba etsa puo ea bona. Petrose o na tsoaela ponong eo Molimo a ileng a mo fa eona le ka neo ea Moea o Halalelang, o ileng oa bula tsela bakeng sa bosebeletsi ho Balichaba. Eaba Pauluse le Barnabase ba arolelana ka lipale tsa bona tsa seo Molimo a se entseng ka bona bakeng sa Balichaba. Ka lebaka leo, mahlo a mangata a bulehela 'nete e ncha. Petrose a re: “ ‘Re lumela hobane re tla bolokeha ka mohau oa Morena Jesu Krete, joaloka bona,’ ” e leng Balichaba (Liketso 15:11). Makholo a lilemo tsa tloaelo e saleng e tsoaroa a ne a phethoha leseling la evangeli.

**Na ho na le nako eo u kileng oa fetola maikutlo a hau ka tsela eo u utloisisang ntho eo u neng u lumela ho eona ka botebo? U ile oa ithuta eng boiphihlelong boo eo mohlomong e ka u thusang hape ha u ka iphumana u ba le pelaelo ka kutloisiso ea hau ka seo u se lumelang?**

## Tharollo e Thata

Ho ne ho hloka boemo bo itseng ba tšepo hore kereke e Antioko e romele baemeli Jerusalema ho ea batla tharollo e tsoang pele bakeng sa khohlano ea bona. Leha ho le joalo, kamor'a lihora tsa puisano pakeng tsa baapostola le baholo, Jakobo, moena oa Jesu, eo ho bonahalang e ne e le moetapele oa 'moka, a etsa qeto ka se lokelang ho etsoa (Liketso 15:13–20). Ho hlakile hore lekhotla le ile la etsa qeto ea hore Balichaba ha ba lokela ho fetoha ba-Juda, ka ho latela melao eohle ea litšebeletso, ho kenyelletsa le lebollo, hore e tle e be Bakreste.

**Bala Amose 9:11, 12 le Jeremia 12:14–16. Baporofeta baa ba Testamente ea Khale ba ile ba porofeta eng ka Israele le lichaba tse pela eona?**

---



---

Leha Jakobo a qotsa ho tsoa ho Amose 9, re bona moo baporofeta ba bang ba Testamente ea Khale ba buang ka pholoho ea lichaba. Ha esale e le morero oa Molimo ho tloha sethathong ho pholosa lefatše lohle ka bopaki le boiphihlelo ba Israele. Hantle, pitso ea Molimo ho Abrahamana e ne e kenyelletsa le tlhohonolofatso ea lichaba tsohle ka eena le ka litlohlo tsa hae (Gen. 12:1–3). Tataiso ea Moea o Halalelang; besebeletsi ba Petrose, Barnabase, le Pauluse har'a Balichaba; le tšokoloho ea Balichaba ba bangata e ne e le bopaki bo ke keng ba behelloa kathoko. Mapaki ana a ile a thusa baetapele ba phutheho ea Bakreste Jerusalema ho hlokomela hore boporofeta bo bongata ba Testamente bo ne bo phethahala. Hantle, Molimo o n'a s'a ntsa fane ka melao e tataisang boteng ba Balichaba Israele e lithibelo tse neng li ba ama (Levitike 17, 18). Jakobo le eena o ile a bua ka melao ena ha a etsa qeto ea hae (Liketso 15:29). Ho ile ha hlaka hore Molimo o ne a bitsa Balichaba hore ba kopane le sechaba sa Hae 'me ba amohele pholoho ka Jesu. Tataiso ea Moea o Halalelang e ile ea fana ka kutloisiso e tebileng ea Lengolo 'me oa ba senolela linnete tsa bohlokoa tseo ba neng ba e-so ka ba li bona pele. Liketso 15:30–35e bolela ka karabo ea balumeli ba Antioko ho qeto e ileng ea etsoa Jerusalema: “[Batho] ba thaba haholo ka baka la khothatso ea bona” (Liketso 15:31). Re bona ho Liketso, mohlala o matla oa kamoo kereke ea pele, ka boinehelo Lentsoeng la Molimo, hammoho le kekelo e tletseng lerato, bonngoe, le tšepo, tlas'a tataiso ea Moea o Halalelang ba tsebileng ho rarolla se batlileng e ba tlokotsi e khoho ho bonngoe.

**Tlaleho ee e re ruta eng ka tsela eo ho leng bohlokoa ka teng bakeng sa rona, hore re se mamele feela seo ba bang ba se buang empa re nahane le hore e ka 'na ea ba ba nepile, leha seo ba se bolelang e se seo re batlang ho se utloa?**

### Ho Ithuta Haholoanyane:

Ellen G. White, “A Seeker for Truth,” maq. 131–142; “Jew and Gentile,” maq. 188–200, ho *The Liketso of the Apostles*. “Lekhotla le neng le etsetsa taba ena qeto le ne le bopiloe ka baapostola le litichere tse neng li hlhalletse ka mahetla ho hlalising likereke tsa Bakreste ba ba-Juda le Balichaba, le baemeli ba khethuoeng ho hlaha libakeng tse fapaneng. Baholo ba Jerusalema le batlatsi ba tsoang Antioke ba ne ba le teng, ’me likereke tse neng li na le tšusumetso ka ho fetisisa li ne li emetsoe. Lekhotla le ne le tsoela pele ka tataiso ea likelello tse chabiselitsoeng leseli, le ka seriti sa kereke e theuoeng ka thato ea leholimo. Kamor’a lipuisano tsa bona bohle ba bona hoba Molimo ka sebele sa Hae ke Eena ea arabetseng potso e neng e le teng ka ho tšollela Moea o Halalelang holim’a Balichaba; ’me ba ile ba eelloa hore ke boikarabello ba bona ho latela tataiso ea Moea o Halalelang. “ ’Moka oohle oa Bakreste ha oa ka oa biletsoa ho etsa khetho holim’a taba ena. ‘Baapostola le baholo, banna ba nang le tšusumetso le hlalefo, ba ile ba lokolisa litaba ba li fa sebopelo ba etsa taelo, e ileng ea amoheloa ke bohle likerekeng tsa Bokreste. Ha se bohle ba neng ba thabisitsoe ke qeto ena; ho ne ho na le sehlopha sa baena ba neng ba na le maikutlo a phahameng ba itšepileng ba neng ba hanana le eona. Banna bana ba ne ba leka ho kena mosebetsing ka boikarabello ba bona. Ba ne ba phathahane ka ho korotla le ho supa liphoso, ba hlalisa maano a macha ’me ba leka ho lia banna bao Molimo a ba tšoaetseng ho ruta molaetsa oa evangeli. Ho tloha sethathong haesale kereke e iphumana e tobana le litšitiso ’me e tla lula e tobana le tsona ho ea fihla pheletsong ea nako.”—Ellen G. White, *The Liketso of the Apostles*, maq. 196, 197.

### Lipotso tsa Puisano:

1. Ke mehato e feng ea ho fihlela tharollo e ileng ea shejoa tlalehong eo re shebaneng le eona bekeng ee eo re ka e sebelisang phuthehong ea kereke ea heno haeba likhang li ka hlaha? Leha taba e ’ngoe eo kereke e ne sebetsana le eona mona e ne e le ea thuto-molimo, re ka ithuta eng litlalehong tsee e ka thusang kereke ha ho hlhella litaba tsa bochaba, tsekisano ea matla, kapa morabe, ’me li beha bonngoe tlokotsing?
2. Talima qotsulo ea Ellen G. White e kaholimo hape. Leha ho bile le litholoana tse ntle, ho ne ho ntse ho na le ba sa khotsofalang. Re ka fumana thuto efe tabeng ee e soabisang?

**Kakaretso:** Kereke ea pele e ne na le mathata a likhohlano holim’a lintlha tse ’maloa tse neng li ka ’na tsa e timetsa. Re bone kamoo kereke, katlas’a tataiso ea Moea o Halalelang le boinehelo Lentsoeng la Molimo, e tsebileng ho rarolla likhohlano le ho qoba likarohano.